

**260**

Na temelju članka 29. stavak (4) Zakona o turističkim zajednicama („Službene novine Tuzlanskog kantona”, broj 11/15), ministar trgovine, turizma i prometa Tuzlanskog kantona donosi

## **PRAVILNIK O KATEGORIZACIJI TURISTIČKIH MJESTA**

### **Članak 1.**

#### **(Predmet pravilnika)**

Ovim pravilnikom uređuju se bliži kriteriji, način vrednovanja kriterija za kategorizaciju turističkih mjesta i način određivanja kategorije turističkih mjesta u Tuzlanskom kantonu (u daljem tekstu: Kanton).

### **Članak 2.**

#### **(Turistička mjesta)**

(1) Turistička mjesta, u smislu ovog pravilnika, predstavljaju teritorijalni okvir općine/grada shodno zakonu kojim se određuje područje općina/gradova u Federaciji Bosne i Hercegovine.

(2) Turistička mjesta u Kantonu razvrstavaju se u kategorije A, B, C i D, u ovisnosti od značaja mjesta za razvoj turizma u Kantonu.

(3) Značaj mjesta za razvoj turizma u Kantonu određuje se prema vrijednostima temeljnih (kvantitativnih) i posebnih (kvalitativnih) kriterija za kategorizaciju turističkog mjesta.

### **Članak 3.**

#### **(Temeljni kriteriji)**

Temeljni kriteriji za kategorizaciju turističkih mjesta su:

a) trogodišnji prosjek ostvarenog broja noćenja u turističkom mjestu (broj noćenja);

b) broj noćenja iz točke a) ovog stavka po stanovniku turističkog mjesta (koeficijent intenziteta turističkog prometa);

c) ukupna vrijednost prometa u turističkoj i ugostiteljskoj djelatnosti po stanovniku mjesta (koeficijent specifičnog turističkog prometa).

### **Članak 4.**

#### **(Posebni kriteriji)**

Posebni kriteriji za kategorizaciju turističkih mjesta su:

a) turističko-ugostiteljski i smještajni kapaciteti odgovarajuće kvalitete,

b) razina izgrađenosti infrastrukture,

c) prirodno i kulturno-povijesno naslijeđe,

d) uređenost javnih površina,

e) dodatna ponuda: šport, kultura, trgovine i sl.

### **Članak 5.**

#### **(Izračun vrijednosti kriterija)**

(1) Vrijednost kriterija iz članka 3. ovog pravilnika utvrđuje se na sljedeći način:

a) prosječna vrijednost ostvarenog broja noćenja u turističkom mjestu (broj noćenja) izračunava se prema broju noćenja u tri uzastopne godine, koje su neposredno prethodile godini u kojoj se obavlja izračunavanje, a na temelju zvaničnih podataka sa kojima raspolaže Ministarstvo trgovine, turizma i prometa Tuzlanskog kantona;

b) vrijednost broja noćenja iz točke a) ovog članka, po stanovniku mjesta (koeficijent intenziteta turističkog prometa) izračunava se na način da se u odnos stavi broj

ostvarenih noćenja u turističkom mjestu prema broju stanovnika iz posljednjeg godišnjeg izvješća objavljenog od strane Federalnog zavoda za statistiku;

c) ukupna vrijednost prometa u turističkoj i ugostiteljskoj djelatnosti (koeficijent specifičnog turističkog prometa) izračunava se na temelju podataka za posljednju godinu koja prethodi godini u kojoj se obavlja izračunavanje, a koji su objavljeni od strane Federalnog zavoda za statistiku.

(2) Utvrđene vrijednosti iz stavka (1) ovog članka svih mjesta se poredaju po veličini u niz posebno za svaki od kriterija nakon čega se za svaki niz izračunava medijan koji predstavlja srednju vrijednost kriterija.

### **Članak 6.**

#### **(Razvrstavanje u A kategoriju)**

Mjesta se razvrstavaju u A kategoriju, ako su vrijednosti kriterija iz članka 5. stavak (1) ovog pravilnika jednake ili veće od:

a) trostruke srednje vrijednosti kriterija iz točke a);

b) trostruke srednje vrijednosti kriterija iz točke b);

c) dva puta veća srednja vrijednost kriterija iz točke c).

### **Članak 7.**

#### **(Razvrstavanje u B kategoriju)**

Mjesta se razvrstavaju u B kategoriju, ako su vrijednosti kriterija iz članka 5. stavak (1) ovog pravilnika jednake ili veće od:

a) dvostruke srednje vrijednosti kriterija iz točke a);

b) dvostruke srednje vrijednosti kriterija iz točke b);

c) srednje vrijednosti kriterija iz točke c).

### **Članak 8.**

#### **(Razvrstavanje u C kategoriju)**

Mjesta se razvrstavaju u C kategoriju, ako su pojedinačne vrijednosti kriterija iz članka 5. stavak (1) ovog pravilnika jednake ili prelaze 50% srednjih vrijednosti za svaki od kriterija posebno.

### **Članak 9.**

#### **(Razvrstavanje u D kategoriju)**

(1) Mjesta koja ne ispunjavaju uvjete iz članaka 6., 7. i 8. ovog pravilnika razvrstavaju se u D kategoriju.

(2) Mjesto iz stavka (1) ovog članka, može se na zahtjev turističke zajednice općine/grada ili turističke zajednice Tuzlanskog kantona, razvrstati u C kategoriju ako:

a) njegove pojedinačne vrijednosti kriterija iznose najmanje 40% srednjih vrijednosti iz članka 5. stavak (1) toč. a), b) i c) ovog pravilnika;

b) se od turizma može očekivati poboljšanje ukupnih privrednih rezultata mjesta.

(3) Uz zahtjev se prilaže program razvoja turizma u mjestu i dokaz o osiguranju sredstava za realiziranje tog programa.

### **Članak 10.**

#### **(Korekcija kategorije turističkog mjesta)**

(1) Kategorija mjesta utvrđena prema kriterijima iz članaka 7., 8. i 9. ovog pravilnika može se korigirati za jednu kategoriju naviše shodno kvalitativnim kriterijima iz članka 4. ovog pravilnika.

(2) Opis i ocjenu kvalitativnih kriterija iz članka 4. ovog pravilnika za mjesto za koje se predlaže korigiranje kategorije daje turistička zajednica općine/grada, odnosno Turistička zajednica Tuzlanskog kantona, prije donošenja odluke o kategorizaciji.

**Članak 11.****(Odluka o kategorizaciji)**

(1) Kategorija mjesta određuje se odlukom ministra trgovine, turizma i prometa Tuzlanskog kantona (u daljem tekstu: ministar) koju donosi uz prethodnu suglasnost Vlade Tuzlanskog kantona

(2) Odluka iz stavka (1) ovog članka važi pet godina.

(3) Ako u tijeku perioda za koji je izdat akt iz stavka (1) ovog pravilnika mjesto stekne uvjete za izmjenu kategorije prema utvrđenim kriterijima na zahtjev turističke zajednice općine/grada, odnosno Turističke zajednice Tuzlanskog kantona, ministar donosi akt o promjeni kategorije mjesta.

(4) Promjena kategorije mjesta vrši se na isti način kao što je utvrđena.

**Članak 12.**

Ovaj pravilnik stupa na snagu danom objave u „Službenim novinama Tuzlanskog kantona”.

<p>Bosna i Hercegovina - Federacija Bosne i Hercegovine - TUZLANSKI KANTON Ministarstvo trgovine, turizma i prometa Broj: 05/1-22-008426/16 Tuzla, 02.03.2016. godine</p>	<p>MINISTAR Mirsad Gluhčić, v.r.</p>
---	--

261

Na temelju članka 72. Zakona o izvršenju Proračuna Tuzlanskog kantona za 2016. godinu („Službene novine Tuzlanskog kantona“, broj: 17/15), Ministarstvo industrije, energetike i rudarstva donosi

**O D L U K U**

**o utvrđivanju uvjeta i kriterija za raspodjelu sredstava sa potrošačke jedinice 13010002 – „Intervencije javnim poduzećima i privrednim društvima“**

**I.**

Ovom odlukom utvrđuju se uvjeti i kriteriji za raspodjelu proračunskih sredstava sa potrošačke jedinice 13010002 „Intervencije javnim poduzećima i privrednim društvima“.

**II.**

Sredstva planirana na potrošačkoj jedinici „Intervencije javnim poduzećima i privrednim društvima“, Ministarstvo industrije, energetike i rudarstva (u daljem tekstu: Ministarstvo), će dodjeljivati privrednim društvima iz oblasti rudarstva, kemijske industrije, metaloprerađivačke, elektroindustrije, industrije građevinskih materijala, građevinarstva, industrije gume i plastike, obuće i tekstila.

**III.**

1. Sredstva raspoređena na ekonomskom kodu 613900 - „Ugovorene i druge posebne usluge“ dodijelit će se za:

a) usluge izrade revizorskih izvješća i odvjetničkih usluga privrednim društvima sa većinskim državnim kapitalom koja ove usluge ne mogu platiti iz svog tekućeg poslovanja uz uvjet:

- da privredno društvo dostavi bilans stanja i bilans uspjeha iz kojeg se vidi da privredno društvo nije u mogućnosti plaćati usluge revizije i odvjetničke usluge.

Aktivnosti nabave ovih usluga provodi Ministarstvo u postupku javne nabave sukladno Zakonu o javnim nabavama.

2. Sredstva raspoređena na ekonomskom kodu 614100 - „Tekući transferi drugim razinama vlasti i fondovima“ dodijelit će se kao:

a) Pomoć privrednim društvima koja nisu u mogućnosti da za svoje radnike osiguraju pristup pravima iz obveznog zdravstvenog osiguranja kao i radnicima koji ovo pravo ne mogu ostvariti putem JU Služba za zapošljavanje Tuzlanskog kantona uz uvjet:

- da imaju pravo na pristup zdravstvenoj zaštiti sukladno članku 11a. Odluke o utvrđivanju osnovica, stopa i načinu obračunavanja i uplate doprinosa za zdravstveno osiguranje na području Tuzlanskog kantona („Službene novine Tuzlanskog kantona“ br. 1/10, 9/12, 4/14, 16/14, 7/15 i 17/15).

b) Sufinanciranje troškova kod realizacije Programa mjera za socijalno zbrinjavanje radnika koji su u procesu stečaja, likvidacije, restrukturiranja i privatizacije poduzeća ostali ili ostaju bez posla, a koji će se realizirati putem Službe za zapošljavanje Tuzlanskog kantona, vezano za izmirivanje obveza po osnovu doprinosa i drugih naknada za povezivanje radnog staža radnicima privrednih društava sa većinskim državnim kapitalom koji su stekli uvjete za umirovljenje uz uvjet:

- da je Vlada Tuzlanskog kantona usvojila Program mjera za socijalno zbrinjavanje radnika.

c) Sufinanciranje troškova kod realizacije Sporazuma o preuzimanju obveze plaćanja obračunatih a neuplaćenih određenih javnih prihoda obveznika uplate Fabrike obuće „Aida“ d.d. Tuzla

Sredstva sa ove pozicije raspoređivat će se sukladno odredbama Sporazuma o preuzimanju obveze plaćanja obračunatih a neuplaćenih određenih javnih prihoda obveznika uplate Fabrike obuće „Aida“ d.d. Tuzla broj: 02/1-14-15824-1/15 od 10.07.2015 godine, koji je potpisan između Vlade Tuzlanskog kantona i FO „Aida“ d.d. Tuzla uz suglasnost Skupštine Tuzlanskog kantona.

3. Sredstva raspoređena na ekonomskom kodu „Subvencije javnim poduzećima“ – ekonomski kod 614400 dodjeljivat će se kao:

a) Pomoć privrednim društvima sa većinskim državnim kapitalom za plaćanje troškova otvaranja stečajnog postupka kad je stečaj pokrenut po prijedlogu privrednog društva ili Vlade Tuzlanskog kantona pod uvjetom:

- da postoji sudsko rješenje o visini potrebnih sredstava.

b) Pomoć privrednim društvima sa većinskim državnim kapitalom u slučaju elementarne nepogode ili za druge slučajeve za koje Ministarstvo procijeni da treba hitno djelovati uz uvjet:

- da je ravnatelj društva podnio zahtjev sa pratećom dokumentacijom iz koje je vidljivo da je došlo do otežavajućih uvjeta poslovanja društva.

4. Sredstva raspoređena na ekonomskom kodu 615500 - „Kapitalni transfer i privatnim poduzećima i poduzetnicima“ dodjeljivat će se za nabavu opreme (strojevi, alati, nove tehnologije) i nova zapošljavanja.

Sredstva će se dodjeljivati privrednim društvima sa najmanje 51% privatnog kapitala čije je sjedište na području Tuzlanskog kantona iz oblasti rudarstva, kemijske industrije, metaloprerađivačke, elektroindustrije, industrije građevinskih materijala, građevinarstva, industrije gume i plastike, obuće i tekstila, putem javnog oglasa na temelju kriterija i uvjeta koji će biti utvrđeni u oglasu.